

# Cudeschs da scola mo en rg davent da 2006?

DA GIERI ANTONI CAVIEZEL

■ **En connex cun il program da spargn propona la regenza grischuna al cussegl grond d'edir davent da l'onn 2006 ils meds d'instrucziun mo en rumantsch grischun (rg). La Lia rumantscha (LR) taxescha questa proposta per ina provocaziun.** Ella è da l'avis che la proposta da la regenza stettia qua senza context e na saja betg da realisar senza mesiras flankantas (LQ dals 29 d'avrigl) e pretenda in cler concept per l'introducziun dal rg en scola e quai tant pli spert.

Tge manegia *Claudio Lardi*, chau dal departament d'educaziun, da la reacziun da la LR? El punctuescha che la regenza haja gè l'incumbensa da spargnar ed i sa tractia da nagut auter che d'ina proposta. «Jau sun era cunscient che las consequenzas da las mesiras da spargn per publicaziuns fan mal a la LR.» Tenor il preventiv saja prevì da scursanir il credit da 710 000 francs (vala per tut-

tas ediziuns dal chantun) per pressapauc 100 000 francs.

Davart in concept ed il proceder enavant en chausa rumantsch grischun n'ha Claudio Lardi betg laschè il giat or dal satg. «L'emprim sto il cussegl prender posiziun e pir lura vesain nus enavant.» Natiralmain che la regenza haja certas imaginaziuns co proceder, dentant veglia ins spetgar la decisiun dal parlament dal zercladur.

Ultra da quai ha Claudio Lardi accentuà che la regenza prevedia in agir precaut davart l'introducziun dal rg en scola. Pressiun da far tant pli spert enavant fetschia la LR. Era concernent l'acceptanza dal rg na sajan la LR e la regenza betg dal medem maini. «Jeu fiss led sch'ils signals da la LR davart l'acceptanza dal rg fissan pli clers.» Plinavant renfatscha Claudio Lardi a la LR dad avoir contrahà cun diversas vischnancas davart l'adiever dal rg, ina chausa che saja cleramain en cumpetenzza dal departament.